



**MEMANDU kendaraan**  
Uber dan GrabCar merupakan pekerjaan samping yang popular ketika ini.  
— Gambar hiasan

# Dua kerja beri impak negatif



SAMSUDDIN



ZAID

**S**EJAK akhir-akhir ini, semakin ramai rakyat Malaysia memilih untuk melakukan dua pekerjaan dalam satu-satu masa.

Ia terpaksa dilakukan bagi menampung perbelanjaan harian yang semakin meningkat terutamanya individu yang tinggal di bandar-bandar besar.

Terdapat juga individu yang sanggup melakukan kerja sampingan bagi memenuhi kehendak untuk menikmati hidup lebih mewah dengan membeli barang-barang berjenama.

Pekerjaan sampingan paling popular ketika ini adalah menjual barang secara online dan menjadi pemandu Uber serta GrabCar.

Begitupun, dalam keghairahan mencari pendapatan tambahan itu, ramai pekerja tidak sedar bahawa tindakan melakukan dua pekerjaan bakal mengundang pelbagai keburukan.

**Pengarah Eksekutif Persekutuan Majikan-Majikan Malaysia, Datuk Samsuddin Bardan berkata,** pekerja yang melakukan dua kerja berkemungkinan berdepan tindakan disiplin atau dibuang kerja oleh majikan.

Jelasnya,

kebanyakan majikan di negara ini melarang para pekerja mereka melakukan kerja sampingan pada waktu pejabat atau selepas masa bekerja.

“Biasanya, majikan akan meletakkan syarat melarang para pekerja mereka melakukan kerja lain dalam tempat pelantikan jawatan.

“Jadi, sekiranya majikan tahu ada pekerja yang melanggar termasuk pekerja tersebut boleh dikenakan tindakan disiplin atau dibuang kerja,” katanya ketika dihubungi *Kosmo!* baru-baru ini.

## Tidak fokus

Menurut Samsuddin, majikan melarang para pekerja melakukan dua kerja kerana ia dikhuatiri akan mengganggu fokus mereka ketika bertugas.

Dia memberitahu, jika seseorang itu menjadi pemandu Uber pada sebelah malam, kesokan harinya pekerja tersebut pasti letih dan tidak dapat fokus pada kerja hakikinya.

“Saya sedar, ramai yang melakukan kerja sampingan bagi menampung perbelanjaan harian. Namun, langkah ini mungkin akan merugikan diri sendiri.

“Sebaiknya, semak semula termasuk lantikan, sama ada majikan melarang anda melakukan kerja sampingan atau tidak,” jelasnya.

Sebelum ini terdapat beberapa pihak dan pertubuhan bukan kerajaan menyarankan supaya rakyat membuat dua kerja bagi menambah pendapatan.

Gesaan itu disambut baik oleh masyarakat terutamanya mereka yang terikat dengan komitmen hutang.

Selain berdepan tindakan daripada majikan, pekerja yang melakukan dua kerja juga akan



**PENINGKATAN kos sara hidup didorong oleh kenaikan harga barang dan perkhidmatan.** — Gambar hiasan

mengalami gangguan dalam aspek kehidupan.

**Pensyarah Fakulti Ekologi Manusia, Universiti Putra Malaysia, Prof. Dr. Zaid Ahmad** memberitahu, tindakan melakukan dua kerja dikhawatirkan akan menjadikan kesejahteraan hidup seseorang.

Katanya, seorang pekerja boleh bekerja selama lapan jam sehari manakala selebihnya untuk menikmati hidup sebagai manusia.

“Melakukan lebih daripada satu kerja hanya dapat menyelesaikan satu masalah iaitu ekonomi. Namun, ia akan mewujudkan masalah baharu.

“Masalah ini berkaitan kesejahteraan hidup. Seseorang yang lakukan dua kerja akan menghadkan masa untuk rehat dan bersama keluarga,” katanya.

Menurut Zaid, kekurangan masa bersama keluarga akan menjadikan pembesaran anak-anak.

Jelasnya, anak-anak yang kurang mendapat kasih sayang daripada ibu bapa akan terpalit dengan masalah sosial apabila meningkat remaja kelak.

“Saya bimbang tindakan ibu bapa yang sibuk mencari wang ketika ini akan memberi impak kepada sosial masyarakat pada masa depan.

“Kita tidak mahu generasi akan datang rosak dan tidak tahu adakah apabila berinteraksi bersama ibu bapa mereka sendiri,” jelasnya.

**LUANGKAN** masa berkualiti bersama ahli keluarga. — Gambar hiasan

